

四庫全書

集部

欽定四庫全書

古今詩刪卷六

明 李攀龍 編

漢詩

栢梁詩 武帝

日月星辰和四時 帝 駢駕馭馬從梁來 梁王孝王武 郡國士

馬羽林材 大司馬 總領天下誠難治 丞相石慶 和撫四夷不易

哉 大將軍衛青 刀筆之吏臣執之 御史大夫倪寬 撞鐘伐鼓聲中詩

太常周建德

宗室廣大日益滋

宗正安國

劉

周衛交戟禁不時

衛尉

路博德

總領從宗栢梁臺

光祿勳徐自為

平理請讞決嫌疑

廷尉杜周

修飾輿馬待駕來

太僕公孫賀

郡國吏功差次之

大鴻臚壺克國

乘

輿御物主治之

少府王溫舒

陳粟萬石揚以箕

大司農張成

徼道

宮下隨討治

執金吾中尉豹

三輔盜賊天下危

左馮翊盛宣

盜阻南

山為民災

扶風李成信

外公家主不可治

京兆尹

椒房率更領

其材

詹事陳掌

蠻夷朝賀常舍其

典屬國

柱杵樽櫨相枝持

大匠

枇杷橘栗桃李梅

大官令

走狗逐兔張果思

上林令

鬻妃女

唇甘如飴

郭舍人

迫窘詰屈幾窮哉

東方朔

誠子詩

東方朔

明者處世莫尚于中優哉游哉於道相從首陽為拙柳
惠為工飽食安步以仕代農依隱玩世詭時不逢才盡
身危好名得華有羣累生孤貴失和遺餘不匱自盡無
多聖人之道一龍一蛇形見神藏與物變化隨時之宜
無有常家

詩四首

蘇武

骨肉緣枝葉結交亦相因四海皆兄弟誰為行路人況
我連枝樹與子同一身昔為鴛鴦今為參辰昔者
常相近邈若胡與秦惟念當乖離恩情日以新鹿鳴思
野草可以喻嘉賓我有一尊酒欲以贈遠人願子留斟酌
叙此平生親

其二

結髮為夫妻恩愛兩不疑歡娛在今夕燕婉及良時征
夫懷往路起視夜何其參辰皆已沒去去從此辭行役

在戰場相見未有期握手一長歎淚為生別滋努力愛
春華莫忘歡樂時生當復來歸死當長相思

其三

黃鵠一遠別千里顧徘徊胡馬失其羣思心常依依何
況雙飛龍羽翼臨當乖幸有絃歌曲可以喻中懷請為
遊子吟泠泠一何悲絲竹厲清聲慷慨有餘哀長歌正
激烈中心愴似摧欲展清商曲念子不得歸俛仰內傷
心淚下不可揮願為雙黃鵠送子俱遠飛

其四

燭燭晨明月馥馥秋蘭芳芬馨良夜發隨風聞我堂征
夫懷遠路遊子戀故鄉寒冬十二月晨起踐嚴霜俯觀
江漢流仰視浮雲翔良友遠別離各在天一方山海隔
中州相去悠且長嘉會難再遇歡樂殊未央願君崇令
德隨時愛景光

與蘇武詩三首

李陵

良時不再至離別在須臾屏營衢路側執手野踟躕仰

視浮雲馳奄忽互相踰風波一失所各在天一隅長當
從此別且復立斯須欲因晨風發送子以賤軀

其二

攜手上河梁游子暮何之徘徊蹊路側悵悵不能辭行
人難久留各言長相思安知非日月弦望自有時努力
崇明德皓首以為期

其三

嘉會難再遇三載為千秋臨河濯長纓念子悵悠悠遠

望悲風至對酒不能酬行人懷往路何以慰我愁獨有
盈觴酒與子結綢繆

悲憤詩二首

蔡琰

漢季失權柄董卓亂天常志欲圖篡弒先害諸賢良逼
迫遷舊邦擁主以自彊海內興義師欲共討不祥卓衆
來東下金甲耀日光平土人脆弱來兵皆胡羌獵野圍
城邑所向悉破亡斬截無孑遺尸骸相掌拒馬邊縣男
頭馬後載婦女長驅西入關迴路險且阻還顧邈冥冥

肝脾為爛腐所畧有萬計不得令屯聚或有骨肉俱欲言
不敢語失意幾微間輒言斃降虜要當以停刃我曹不活
汝豈復惜性命不堪其言罵或便加捶杖毒痛慘并下旦
則號泣行夜則悲吟坐欲死不能得欲生無一可彼蒼者
何辜乃遭此厄禍邊荒與華異人俗少義理處所多霜雪
胡風春夏起翩翩吹我衣肅肅入我耳感時念父母哀歎
無窮已有客從外來聞之常歡喜迎問其消息輒復非鄉
里邂逅徼時願骨肉來迎已自得自解免當復棄兒子天

屬綴人心念別無會期存亡永乖隔不忍與之辭兒前抱
我頸問母欲何之人言母當去豈復有還時阿母常仁惻
今何更不慈我尚未成人奈何不顧思見此崩五內恍惚
生狂癡號泣手撫摩當發復回疑兼有同時輩相送告
別離慕我獨得歸哀叫聲摧裂馬為立踟躕車為不轉轍觀
者皆歔欷行路亦嗚咽去去割情戀遠征日遐邁悠悠三千
里何時復交會念我出腹子胸臆為摧敗既至家人盡又復無
中外城郭為山林庭宇生荆艾白骨不知誰從橫莫覆蓋出門

無人聲豺狼號且吠
斃斃對孤景怛怛糜肝肺登高遠
眺望魂神忽飛逝
奄若壽命盡旁人相寬大為復彊視
息雖生何聊賴託命於新人竭心自勛厲
流離成鄙賤常恐復捐廢人生幾何時懷憂終年歲

其二

嗟薄祐兮遭世患
宗族殄兮門戶單身執畧兮入西關
歷險阻兮之羌蠻
山谷眇兮路漫漫
眷東顧兮但悲歎
冥當寢兮不能安
饑當食兮不能餐
常流涕兮皆不乾

薄志節兮念死難雖苟活兮無形顏惟彼方兮遠陽精
陰氣凝兮雪夏零沙漠壅兮塵冥冥有草木兮春不榮
人似禽兮食臭腥言玃離兮狀竊停歲聿暮兮時邁征
夜悠長兮禁門扃不能寐兮起屏營登胡殿兮臨廣庭
玄雲合兮翳月腥北風厲兮肅泠泠胡笳動兮邊馬鳴
孤鴈歸兮聲嚶嚶樂人興兮彈琴箏音相和兮悲且清
心吐思兮胃憤盈欲舒氣兮恐被驚含哀咽兮涕沾頤
家既迎兮當歸寧臨長路兮捐所生兒呼母兮啼失聲

我掩耳兮不忍聽
追持我兮走荒荒
頓復起兮毀顏形
還顧之兮破人情
心怛絕兮死復生

盤中詩

蘇伯玉妻

山樹高鳥鳴
悲泉水深鯉魚肥
空倉鵲常苦饑
吏人婦會夫稀
出門望見白衣謂當是
而更非
還入門中心悲
北上堂西入階
急機絞杼聲催長嘆息
當語誰君有行
妾念之出有日
還無期
結巾帶長相思
君忘妾未知之
妾忘君罪當治
妾有行宜知之
黃者金白者玉
高者山

下者谷姓者蘇字伯玉人才多知謀足家居長安身在蜀何惜馬蹄歸不數羊肉千斤酒百斛令君馬肥麥與粟今時人知四足與其書不能讀當從中央周四角

惟泰元

無名氏

惟泰元尊媪神蕃釐經緯天地作成四時精建日月星辰度理陰陽五行周而復始雲風雷電降甘露雨百姓蕃滋咸循厥緒繼統共勤順皇之德鸞路龍鱗罔不矜飾嘉邊列陳庶幾宴享滅除凶災烈騰八荒鐘鼓箏篴

雲舞翔翔招搖靈旗九夷賓將

華煜煜

無名氏

華煜煜固靈根神之游過天門車千乘敦昆侖神之出
排玉房周流雜拔蘭堂神之行旌容容騎沓沓般從從
神之徠泛翊翊甘露降慶雲集神之榆臨壇宇九疑賓
夔龍舞神安坐鵝吉時共翊翊合所思神嘉虞申貳觴
福滂洋邁延長沛施祐汾之阿揚金光橫泰河莽若雲
增揚波徧臚驪騰天歌

古詩十九首

無名氏

行行重行行與君生別離相去萬餘里各在天一涯道
路阻且長會面安可知胡馬依北風越鳥巢南枝相去
日已遠衣帶日已緩浮雲蔽白日遊子不顧返思君令
人老歲月忽已晚棄捐勿復道努力加餐飯

其二

青青河畔草鬱鬱園中柳盈盈樓上女皎皎當牕牖娥
娥紅粉妝纖纖出素手昔為倡家女今為蕩子婦蕩子

行不歸空牀難獨守

其三

青青陵上栢磊磊澗中石人生天地間忽如遠行客斗
酒相娛樂聊厚不為薄驅車策駑馬游戲宛與洛洛中
何鬱鬱冠帶自相索長衢羅夾巷王侯多第宅兩宮遙
相望雙闕百餘尺極宴娛心意戚戚何所迫

其四

今日良宴會歡樂難具陳彈箏奮逸響新聲妙入神令

德唱高言識曲聽其真齊心同所願含意俱未申人生
寄一世奄忽若颺塵何不策高足先據要路津無為守
窮賤輾軻長苦辛

其五

西北有高樓上與浮雲齊交疏結綺牕阿閣三重堦上
有絃歌聲音響一何悲誰能為此曲無乃杞梁妻清商
隨風發中曲正徘徊一彈再三歎慷慨有餘哀不惜歌
者苦但傷知音稀願為雙鴻鵠奮翅起高飛

其六

涉江采芙蓉蘭澤多芳草采之欲遺誰所思在遠道還
顧望舊鄉長路漫浩浩同心而離居憂傷以終老

其七

明月皎夜光促織鳴東壁玉衡指孟冬衆星何歷歷白
露沾野草時節忽復易秋蟬鳴樹間玄鳥逝安適昔我
同門友高舉振六翮不念攜手好棄我如遺跡南箕吐
有斗牽牛不負輓良無盤石固虛名復何益

其八

冉冉孤生竹結根泰山阿與君為新婚兔絲附女蘿兔
絲生有時夫婦會有宜千里遠結婚悠悠隔山陂思君
令人老軒車來何遲傷彼蕙蘭花含英揚光輝過時而
不采將隨秋草萎君亮執高節賤妾亦何為

其九

庭中有奇樹綠葉發華滋攀條折其榮將以遺所思馨
香盈懷袖路遠莫致之此物何足貴但感別經時

其十

迢迢牽牛星皎皎河漢女纖纖擢素手札札弄機杼終
日不成章泣涕零如雨河漢清且淺相去復幾許盈盈
一水間脈脈不得語

其十一

迴車駕言邁悠悠涉長道四顧何茫茫東風搖百草所
遇無故物焉得不速老盛衰各有時立身苦不早人生
非金石豈能長壽考奄忽隨物化榮名以為寶

其十二

東城高且長逶迤自相屬迴風動地起秋草萋已綠四
時更變化歲暮一何速晨風懷苦心蟋蟀傷局促蕩滌
放情志何為自結束燕趙多佳人美者顏如玉被服羅
裳衣當戶理清曲音響一何悲絃急知柱促馳情整巾
帶沈吟聊躑躅思為雙飛燕銜泥巢君屋

其十三

驅車上東門遙望郭北墓白楊何蕭蕭松柏夾廣路下

有陳死人杳杳即長暮潛寐黃泉下千載永不寤浩浩
陰陽移年命如朝露人生忽如寄壽無金石固萬歲更
相送賢聖莫能度服食求神仙多為藥所誤不如飲美
酒被服紬與素

其十四

去者日以疎來者日以親出郭門直視但見丘與墳古
墓犁為田松柏摧為薪白楊多悲風蕭蕭愁殺人思還
故里閭欲歸道無因

其十五

生年不滿百常懷千歲憂晝短苦夜長何不秉燭游為
樂當及時何能待來茲愚者愛惜費但為後世嗤仙人
王子喬難可與等期

其十六

凜凜歲云暮螻蛄夕鳴悲涼風率已厲遊子寒無衣錦
衾遺洛浦同袍與我違獨宿累長夜夢想見容輝良人
惟古歡枉駕惠前綏願得常巧笑攜手同車歸既來不

須臾又不處重闌亮無晨風翼焉能凌風飛眄睐以適
意引領遙相睇徙倚懷感傷垂涕沾雙扉

其十七

孟冬寒氣至北風何慘慄愁多知夜長仰觀衆星列三
五明月滿四五蟾兔缺客從遠方來遺我一書札上言
長相思下言久離別置書懷袖中三歲字不減一心抱
區區懼君不識察

其十八

客從遠方來遺我一端綺相去萬餘里故人心尚爾文
彩雙鴛鴦裁為合歡被著以長相思緣以結不解以膠
投漆中誰當別離此

其十九

明月何皎皎照我羅牀幃憂愁不能寐攬衣起徘徊客
行雖云樂不如早旋歸出戶獨徬徨愁思當告誰引領
還入房淚下沾裳衣

古詩二首

無名氏

上山採靡蕪下山逢故夫長跪問故夫新人復何如新人雖言好未若故人姝顏色類相似手爪不相如新人從門入故人從閣去新人工織縑故人工織素織縑日一匹織素五丈餘將縑來比素新人不如故

其二

步出城東門遙望江南路前日風雪中故人從此去我欲渡河水河水深無梁願為雙黃鵠高飛還故鄉

李陵錄別詩四首

擬作無名氏

爍爍三星列拳拳月初生寒涼應節至蟋蟀夜悲鳴晨
風動喬木枝葉日夜零遊子暮思歸塞耳不能聽遠望
正蕭條百里無人聲豺狼鳴後園虎豹步前庭遠處天
一隅苦困獨零丁親人隨風散歷歷如流星浮萍離不
結思心獨屏營願得萱草枝以解饑渴情

其二

寂寂君子坐奕奕合衆芳溫聲何穆穆因風動馨香
清言振東序良時著西庠乃命絲竹音列席無高唱悲

意何慷慨清歌正激揚長哀發華屋四坐莫不傷

其三

晨風鳴北林熠燿東南飛願言所相思日暮不垂帷
明月照高樓想見餘光輝玄鳥夜過庭髣髴能復飛
褰裳路踟躕傍徨不能歸浮雲日千里安知我心悲
思得瓊樹枝以解長渴饑

其四

紅塵蔽天地白日何冥冥微陰盛殺氣淒風從此興
招

搖西北指天漢東南傾嗟爾窮廬子獨行如履冰短褐
中無緒帶斷續以繩瀉水置瓶中焉辨淄與澠巢父不
洗耳後世有何稱

蘇武答詩

擬作無名氏

童童孤生柳寄根河水泥連翩遊客于于冬服涼衣去
家千里餘一身常渴饑寒夜立清庭仰瞻天漢湄寒風
吹我骨嚴霜切我肌憂心常慘戚晨風為我悲瑤光遊
何速行願子行遲仰視雲間星忽若割長帷低頭還自

憐盛年行已衰依依戀明世愴愴難久懷

古詩

無名氏

採葵莫傷根傷根葵不生結交莫羞貧羞貧友不成

古絕句二首

無名氏

藁砧今何在山上復有山何當大刀頭破鏡飛上天

其二

日暮秋雲陰江水清且深何用通音信蓮花玳瑁簪

古歌

無名氏

高田種小麥終久不成穗男兒在他鄉焉得不憔悴

古樂府

無名氏

蘭草自然香生於大道旁腰鐮八九月俱在束薪中

魏詩

黎陽作

文帝

千騎隨風靡萬騎正龍驤金鼓震上下干戚紛從橫
旄若素霓丹旗發朱光追思太王德胥宇識足臧
經歷萬歲林行行到黎陽

於醺作

文帝

清夜延貴客明燭發高光
豐膳漫星陳旨酒盈玉觴
絃歌奏清曲游響拂丹梁
餘音赴迅節慷慨時激揚
獻酬紛交錯雅舞何鏘鏘
羅纓從風飛長劒自低昂
穆穆衆君子和合同樂康

芙蓉池作

文帝

乘輦夜行游逍遙步西園
雙渠相溉灌嘉木繞通川
卑枝拂羽蓋修條摩蒼天
驚風扶輪轂飛鳥翔我前
丹霞

夾明月華星出雲間上天垂光彩五色一何鮮壽命非
松喬誰能得神仙遨遊快心意保已終百年

於玄武陂作

文帝

兄弟共行游驅車出西城野田廣開闢川渠互相經黍
稷何鬱鬱流波激悲聲菱芡覆綠水芙蓉發丹榮柳垂
重蔭綠向我池邊生乘渚望長洲羣鳥譁鳴萍藻泛
濫浮澹澹隨風傾忘憂共容與暢此千秋情

雜詩二首

文帝

漫漫秋夜長烈烈北風涼展轉不能寐披衣起彷徨
彷徨忽已久白露沾我裳俯視清水波仰看明月光天漢
回西流三五正從橫草蟲鳴何悲孤鴈獨南翔鬱鬱多
悲思綿綿思故鄉願飛安得翼欲濟河無梁向風長嘆
息斷絕我中腸

其二

西北有浮雲亭亭如車蓋惜哉時不遇適與飄風會吹
我東南行行行至吳會吳會非我鄉安得久留滯棄置

勿復陳客子常畏人

朔風詩二首

陳思王植

四氣代謝懸景運周別如俯仰脫若三秋昔我初遷朱
華未晞今我旋止素雪云飛

其二

子好芳草宣忘爾貽繁華將茂秋霜悴之君不垂眷豈
云其誠秋蘭可喻桂樹冬榮

矯志詩

陳思王植

芝桂雖芳難以餌烹尸位素餐難以成名磁石引鐵於
金不連大朝舉士愚不聞焉抱壁塗乞無為貴寶履仁
邁禍無為貴道鴛鴦遠害不羞卑棲靈虬避難不恥污
泥都蔗雖甘杖之必折巧言雖美用之必滅濟濟唐朝
萬邦作孚逢蒙雖巧必得良弓聖主雖知必得英雄螳
螂見嘆齊士輕戰越王軾蛙國以死獻道遠知驥世偽
知賢覆之幬之順天之矩澤如凱風惠如時雨口為禁
闔舌為發機門機之闔楛矢不追

公宴詩

陳思王植

公子敬愛客終宴不知疲清夜游西園飛蓋相追隨
明月澄清影列宿正參差秋蘭被長坂朱華冒綠池潛魚
躍清波好鳥鳴高枝神飈接丹轂輕輦隨風移飄飄放
志意千秋長若斯

贈徐幹

陳思王植

驚風飄白日忽然歸西山圓景光未滿衆星燦以繁志
士營世業小人亦不閒聊且夜行游游彼雙闕間文昌

鬱雲興迎風高中天春鳩鳴飛棟流焱激櫺軒顧念蓬
室士貧賤誠足憐薇蕨弗充虛皮褐猶不全慷慨有悲心興
文自成篇寶棄怨何人和氏有其愆彈冠俟知己知己
誰不然良田無晚歲膏澤多豐年亮懷璫璆與美積久
德愈宣親交義在敦申章復何言

又贈丁儀王粲

陳思王植

從軍度函谷驅馬過西京山岑高無極涇渭揚濁清壯
哉帝王居住麗殊百城員闕出浮雲承露槩秦清皇佐

揚天惠四海無交兵權家雖愛勝全國為令名君子在
末位不能歌德聲丁生怨在朝王子歡自營歡怨非貞
則中和誠可經

三良詩

陳思王植

功名不可為忠義我所安秦穆先下世三臣皆自殘生
時等榮樂既沒同憂患誰言捐軀易殺身誠獨難攬
涕登君墓臨穴仰天歎長夜何冥冥一往不復還黃鳥
為悲鳴哀哉傷肺肝

雜詩三首

陳思王植

高臺多悲風，朝日照北林。
之子在萬里，江湖迴且深。
方舟安可極，離思故難任。
孤鴈飛南遊，過庭長哀吟。
翹思慕遠人，願欲托遺音。
形影忽不見，翩翩傷我心。

其二

南國有佳人，容華若桃李。
朝遊江北岸，夕宿瀟湘沚。
時俗薄朱顏，誰為發皓齒。
俛仰歲將暮，榮耀難久恃。

其三

攬衣出中閨逍遙步兩楹閒房何寂寞綠草被堦庭空
室自生風百鳥翩南征春思安可忘憂戚與我并佳人
在遠道妾身單且乳歡會難再遇芝蘭不重榮人皆棄
舊愛君豈若平生寄松為女蘿依水如浮萍貴身奉衿
帶朝夕不墮傾倘終顧盼恩永副我中情

七哀詩

陳思王植

明月照高樓流光正徘徊上有愁思婦悲歎有餘哀借
問歎者誰言是蕩子妻君行踰十年孤妾常獨棲君若清

路塵妾若濁水泥浮沈各異勢會合何時諧願為西南
風長逝入君懷君懷良不開賤妾當何依

贈五官中郎將二首

劉楨

昔我從元后整駕至南鄉過彼豐沛都與君共翱翔四
節相推斥季冬風且涼衆賓會廣坐明鐙燿炎光清歌
製妙聲萬舞在中堂金罍含甘醴羽觴行無方長夜忘
歸來聊且為太康四牡向路馳歡悅誠未央

其二

秋日多悲懷感慨以長嘆終夜不遑寐叙意於濡翰明
鐙曜閨中清風淒已寒白露塗前庭應門重其關四節
相推斥歲月忽已殫壯士遠出征戎事將獨難涕泣灑
衣裳能不懷所歡

公讌詩

劉楨

永日行遊戲歡樂猶未央遺思在玄夜相與復翱翔輦
車飛素蓋從者盈路旁月出照園中珍木鬱蒼蒼清川
過石渠流波為魚防芙蓉散其華菡萏溢金塘靈鳥宿

水禽仁獸游飛梁華館寄流波豁達來風涼生平未始
聞歌之安能詳投翰長嘆息綺麗不可忘

侍五官中郎將建章臺集詩應瑒

朝鴈鳴雲中音響一何哀問子游何鄉戢翼正徘徊言
我塞門來將就衡陽栖往春翔北土今冬客南淮遠行
蒙霜雪毛羽日摧頽常恐傷肌骨身隕沈黃泥簡珠墮
沙石何能中自諧欲因雲雨會濯翼陵高梯良遇不可
值伸眉路何階公子敬愛客樂飲不知疲和顏既已暢

乃肯顧細微贈詩見存慰小子非所宜且為極歡情不
醉其無歸凡百敬爾位以副饑渴懷

百一詩三首

應璩

下流不可處君子慎厥初名高不宿著易用受侵誣前
者隳官去有人適我閭田家無所有酌醴焚枯魚問我
何功德三入承明廬所占於此土是謂仁智居文章不
經國筐篋無尺書用等稱才學往往見歎譽避席跪自
陳賤子實空虛宋人遇周客慙愧靡所知

其二

年命在桑榆東岳與我期長短有常會遲速不得辭斗
酒多為樂無為待來茲室廣致凝陰臺高來積陽奈何
季世人侈靡在宮牆飾巧無窮極土木被朱光徵求傾
四海雅意猶未康

其三

子弟可不慎慎在選師友師友必長德中才可進誘

七哀詩

阮瑀

丁年難再遇富貴不重來良時忽一過身體為土灰冥
冥九泉室漫漫長夜臺身盡氣力索精魂靡所能嘉肴
設不御旨酒盈觴杯出壙望故鄉但見蒿與萊

公讌詩

王粲

昊天降豐澤百卉挺葳蕤涼風撤蒸暑清雲却炎暉高
會君子堂並坐蔭華棖嘉肴充圓方旨酒盈金罍管絃
發徽音曲度清且悲合坐同所樂但慙杯行遲常聞詩
人語不醉且無歸今日不極歡含情欲待誰見眷良不

翹守分豈能違古人有遺言君子福所綏願我賢主人
與天享魏魏克符周公業奕世不可追

從軍詩三首

王粲

從軍有苦樂但問所從誰所從神且武焉得久勞師相
公征關右赫怒震天威一舉滅獯虜再舉服羌夷西收
邊地賊忽若俯拾遺陳賞越丘山酒肉踰川坻軍中多
沃饒人馬皆溢肥徒行兼乘還空出有餘資拓地三千
里往返速如飛歌舞入鄴城所願獲無違晝日處大朝

日暮薄言歸外叅時明政內不廢家私禽獸憚為犧良
苗實已揮竊慕負鼎翁願厲朽鈍安不能效沮溺相隨
把鋤犁熟覽夫子詩信知所言非

其二

從軍征遐路討彼東南夷方舟順廣川薄暮未安抵白
日半西山桑梓有餘暉蟋蟀夾岸鳴孤鳥翩翩飛征夫
心多懷悽愴令吾悲下船登高防草露沾我衣迴身赴
牀寢此愁當告誰身服干戈事豈得念所私即戎有授

命茲理不可違

其三

悠悠涉荒路靡靡我心愁
四望無煙火但見林與丘
城郭生榛棘蹊徑無所由
荏蒲竟廣澤葭葦夾長流
日夕涼風發翩翩漂
吾舟寒蟬在樹鳴鸛鵲摩
天游客子多悲傷淚下不
可收朝入譙郡界曠然消
人憂雞鳴達四境黍稷盈
原疇館宅充鄧里士女
滿莊廬自非賢聖國誰能
享斯休詩人美樂土雖客
猶願留

詠史詩

王粲

自古無殉死達人共所知秦穆殺三良惜哉空爾為
結髮事明君受恩良不訾臨歿要之死焉得不相隨
妻子當門泣兄弟哭路陲臨穴呼蒼天涕下如綆縻
人生各有志終不為此移同知埋身劇心亦有所施
生為百夫雄死為壯士規黃鳥作悲詩至今聲不虧

七哀詩二首

王粲

西京亂無象豺虎方遘患復棄中國去委身適荆蠻親
戚對我悲朋友相追扳出門無所見白骨蔽平原路有

飢婦人抱子棄草間
顧聞號泣聲揮涕獨不還
未知身死處何能兩相完
驅馬棄之去不忍聽此言
南登霸陵岸回首望長安
悟彼下泉人喟然傷心肝

其二

荆蠻非我鄉何為久滯淫
方舟泝大江日暮愁我心
山岡有餘映巖阿增重陰
狐狸馳赴穴飛鳥翔故林
流波激清響猿猴臨岸吟
迅風拂裳袂白露沾衣襟
獨夜不能寐攝衣起撫琴
絲桐感人情為我發悲音
羈旅無終極憂思壯難忍

贈秀才入軍二首

嵇康

良馬既閑麗服有暉左攬繁弱右接忘歸風馳電逝躡景追飛凌厲中原顧盼生姿

其二

息徒蘭圃秣馬華山流磻平皋垂綸長川目送歸鴻手揮五絃俯仰自得游心太玄嘉彼釣叟得魚忘筌野人逝矣誰與盡言

酒會詩

嵇康

樂哉苑中遊周覽無窮已百卉吐芳華崇基邈高峙

林木紛交錯玄池戲魴鯉輕九斃翔禽纖綸出鱣鮪坐
中發美讚異氣同音軌臨川獻清酤微歌發皓齒素琴
揮雅操清聲隨風起斯會豈不樂恨無東野子酒中念
幽人守故彌終始但當體七絃寄心在知己

與阮德如

嵇康

含哀還舊廬感切傷心肝良時邁數子談慰莫如蘭疇
昔恨不早既面佯舊歡不悟卒永離念隔增憂嘆事故
無不有別易會良難郢人忽已逝匠石寢不言澤雉窮

野草靈龜樂泥蟠
榮名穢人身高位多災患
未若捐外累肆志養浩然
顏氏希有虞隰子慕黃軒
洎彭獨何人惟志在所安
漸漬狗近欲一往不可攀
生生在豫積勿以怵自寬
南土旱不涼衿計宜早完
君其愛德素行路慎風寒
自力致所懷臨文情辛酸

詠懷七首

阮籍

天馬出西北由來從東道
春秋非有託富貴焉常保清
露被皋蘭凝霜沾野草
朝為媚少年夕暮成醜老
自非

王子晉誰能常美好

其二

平生少年時輕薄好絃歌西遊咸陽中趙李相經過娛
樂未終極白日忽蹉跎驅馬復來歸反顧望三河黃金
百鎰盡資用常苦多北臨太行道失路將如何

其三

湛湛長江水上有楓樹林
華蘭被徑路青驪逝駸駸
遠望令人悲春氣感我心
三楚多秀士朝雲進荒淫
朱華

振芬芳高蔡相追尋一為黃雀哀淚下誰能禁

其四

昔年十四五志尚好詩書被褐懷珠玉顏閔相與期
軒臨四野登高望所思丘墓蔽山岡萬代同一時千秋
萬歲後榮名安所之乃悟羨門子噉噉今自嗤

其五

駕言發魏都南向望吹臺簫管有遺音梁王安在哉戰
士食糟糠賢者處蒿萊歌舞曲未終秦兵已復來夾林

非吾有朱宮生塵埃軍敗華陽下身竟為土灰

其六

炎光延萬里洪川蕩湍瀨彎弓挂扶桑長劒倚天外泰山成砥礪黃河為裳帶視彼莊周子榮枯何足賴捐身棄中野烏作患害豈若雄傑士功名從此大

其七

少年學擊刺妙伎過曲城英風截雲霓超世發奇聲揮劒臨沙漠飲馬九野垌旗幟何翩翩但聞金鼓鳴軍旅

令人悲烈烈有哀情念我平常時悔恨從此生



古今詩刪卷六

欽定四庫全書

集部

古今詩刪卷八

詳校官中書_臣李采

侍讀_臣孫球覆勘

總校官庶吉士_臣倉聖脉

校對官侍詔_臣胡士震

謄錄監生_臣陳太初

欽定四庫全書

古今詩刪卷七

明 李攀龍 編

晉詩

答何劭三首

張華

吏道何其迫，窘然坐自拘。
纓綬為徽纒，文憲焉可踰。
恬曠苦不足，煩促每有餘。
良朋貽新詩，示我以游娛。
穆如灑清風，煥若春華敷。
自昔同寮寗，於今比園廬。
衰疾近

辱殆庶幾並懸輿散髮重陰下抱杖臨清渠屬耳聽鶯
鳴流目翫儵魚從容養餘日取樂於桑榆

其二

洪鈞陶萬類大塊稟羣生明闇信異姿靜躁亦殊形自
予及有識志不在功名虛恬竊所好文學少所經忝荷
既過任白日已西傾道長苦智短責重困才輕周任有
遺規其言明且清負乘為我戒夕惕坐自驚是用感嘉
貺寫心出中誠發篇雖溫麗無乃違其情

其三

駕言歸外庭放志永棲遲相伴步園疇春草鬱鬱滋榮觀
雖盈目親友莫與偕悟物增隆思結戀慕同儕援翰屬新
詩永嘆有餘懷

情詩

張華

游目四野外逍遙獨延佇蘭蕙緣清渠繁華陰綠渚佳
人不在茲取此欲誰與巢居知風寒穴處識陰雨不曾
遠別離安知慕儔侶

雜詩 傅玄

志士惜日短，愁人知夜長。
攝衣步前庭，仰觀南鴈翔。
玄景隨形運，流響歸空房。
清風何飄颻，微月出西方。
繁星依青天，列宿自成行。
蟬鳴高樹間，野鳥號東廂。
纖雲時鬋鬋，渥露沾我裳。
良時無停景，北斗忽低昂。
常恐寒節至，凝氣結為霜。
落葉隨風摧，一絕如流光。

贈馮文舉遷斥邱令二首

陸機

嗟我人斯哉，翼江潭有命集。
止翻飛自南出，自幽谷及

爾同林雙情交映遺物識心

其二

人亦有言交道實難有類者弁千載一彈今我與子曠
世齊歡利斷金石氣惠秋蘭

贈馮文熊

陸機

昔與二三子游息承華南拊翼同枝條翻飛各異尋苟
無凌風翮徘徊守故林慷慨誰為感願言懷所欽發軔
清洛汭驅馬大河陰佇立望朔塗悠悠迴且深分索古

所悲志士多苦心悲情臨川結苦言隨風吟愧無雜佩
贈良訊代兼金夫子茂遠猷款誠寄惠音

贈顧交趾公貞

陸機

顧侯體明德清風肅已邁發迹翼藩后改授撫南裔伐
鼓五嶺表揚旌萬里外遠績不辭小立德不在大高山
安足凌巨海猶縈帶惆悵瞻飛駕引領望歸旆

為顧彥先贈婦二首

陸機

辭家遠行遊悠悠三千里京洛多風塵素衣化為緇脩

身悼憂苦感念同懷子隆思亂心曲沈歡滯不起歡沈
難克興心亂誰為理願假歸鴻翼翻飛浙江汜

其二

東南有思婦長歎充幽闥借問歎何為佳人眇天末游
宦久不歸山川脩且闊形影參商乖音息曠不達離合
非有常譬彼絃與箏願保金石軀慰妾長饑渴

為陸思遠婦作

陸機

二合兆嘉偶女子禮有行潔已入德門終遠母與兄如

何耽時寵游官忘歸寧雖為三載婦顧景媿虛名歲暮
饒悲風洞房涼且清拊枕循薄質非君誰見榮離君多
悲心寤寐勞人情敢忘桃李陌側想瑤與瓊

赴洛道中作二首

陸機

總轡登長路鳴咽辭密親借問子何之世網嬰我身永
嘆遵北渚遺思結南津行行遂已遠野途曠無人山澤
紛紆餘林薄杳阡眠虎嘯深谷底雞鳴高樹顛哀風中
夜流孤獸更我前悲情觸物感沈思鬱纏綿佇立望故

鄉顧影悽自憐

其二

遠遊越山川山川脩且廣
振策陟崇丘安轡遵平莽
夕息抱影寐朝徂銜思往
頓轡倚高巖側聽悲風響
清露墜素輝明月一何朗
撫枕不能寐振衣獨長想

吳王郎中時從梁陳作

陸機

在昔蒙嘉運矯迹入崇賢
假翼鳴鳳條濯足升龍淵
玄冕無醜士冶服使我妍
輕劒拂鞶厲長纓麗且鮮
誰謂

伏事淺契闊踰三年薄言肅後命改服就藩臣夙駕尋
清軌遠遊越梁陳感物多遠念慷慨懷古人

招隱詩

陸機

明發心不爽振衣聊躑躅躑躅欲安之幽人在浚谷朝
采南澗藻夕息西山足輕條象雲構密葉承翠幄激楚
佇蘭林回芳薄秀木山溜何泠泠飛泉漱鳴玉哀音附
靈波頽響赴曾曲至樂非有假安事澆淳樸富貴苟難
圖稅駕從所欲

擬青青陵上栢

陸機

冉冉高陵蘋習習隨風翰人生當幾時譬彼濁水瀾戚戚多滯念置酒宴所歡方駕振飛轡遠遊入長安名都一何綺城闕鬱盤桓飛閣纓虹帶層臺冒雲冠高門羅北闕甲第椒與蘭俠客控絕景都人驂玉軒遨遊放情願慷慨為誰歎

日出東南隅行

陸機

扶桑升朝暉照此高臺端高臺多妖麗澹房出清顏淑

貌耀皎日惠心清且閑美目揚玉澤蛾眉象翠翰鮮膚
一何潤秀色若可餐窈窕多容儀婉婉媚巧笑言暮春春
服成粲粲綺與紵金雀垂藻翹瓊珮結瑤璫方駕揚清
塵濯足洛水瀾藹藹風雲會佳人一何繁南崖充羅幕
北渚盈軒軒清川含藻景高崖被華丹馥馥芳袖揮泠
泠纖指彈悲歌吐清響雅舞播幽蘭丹唇含九秋妍迹
陵七盤赴曲迅驚鴻蹈節如集鸞綺態隨顏變沈安無
定源俯仰紛阿那顧步咸可懽遺芳結飛颿浮景映清

湍治容不足詠春遊良可歎

贈鄱陽府君張仲膺四首

陸雲

神林何有奇華妙實皇朝如何窮文極質斌斌君子升
堂入室太上有曜子誕其輝知機日難子達其微入輔
幃幄出御千里滔滔江漢南國之紀

其二

謁帝東堂剖符南征天子命我車服以榮何以潤之德
被蒼生何以濟之威振羣城却愚以化崇賢以仁鳳舒

其翮龍濯其鱗憶彼荒數莫敢不賓雖云舊邦其命維新

其三

卞和南金終始一色顯允君子窮達一德宏仁厲道物究其極古賢受爵循牆虔恭今哲居貴履盈如冲接新以化愛舊以豐隆此嚶鳴悖彼谷風

其四

忠至寵加孝至榮集內崇南芬外清名邑煒煒棠棣賔

增其華猗猗桑梓厥耀孔多被繡畫行昔人攸羨階雲
飛藻孰與同榮

贈顧彥先

陸雲

玄黃挺秀誕受至真行該其高德備其新光瑩之偉隋
卞同珍騰都之駿龍鳳合塵

為顧彥先贈婦往返四首

陸雲

我在三川陽子居五湖陰山海一何曠譬彼飛與沈目
想清慧姿耳存淑媚音獨寐多遠念寤言撫空衿彼美

同懷子非爾誰為心

其二

悠悠君行邁
乳乳妾獨止
山河安可踰
水路隔萬里
京室多妖冶
粲粲都人子
雅步擢纖腰
巧言發皓齒
佳麗良可美
哀賤焉足紀
遠蒙眷顧言
銜恩非望始

其三

翩翩飛蓬征
郁郁寒水縈
遊止固殊性
浮沈豈一情
隆愛結在昔
信誓貫三靈
秉心金石固
豈從時俗傾
美目

逝不顧纖腰徒盈盈何用結中款仰指北辰星

其四

浮海難為水游林難為觀容色貴及時朝華忌日宴皎皎彼妹子灼灼懷春粲西城善雅舞總章饒清彈鳴簧發丹唇朱絃繞素腕輕裾猶電揮雙袂如霧散華容溢藻幄哀響入雲漢知音世所希非君誰能讚棄置北辰星問此玄龍煥時暮復何言華落理必賤

河陽縣作二首

潘岳

微身輕蟬翼弱冠忝嘉招在疚妨賢路再升上宰朝猥
荷公叔舉連陪廁王寮長嘯歸東山擁耒耨時苗幽谷
茂纖葛峻巖敷榮條落英隕林趾飛莖秀陵喬卑高亦
何常升降在一朝徒恨良時泰小人道遂消譬如野田
蓬幹流隨風飄昔倦都邑游今掌河朔徭登城眷南顧
颯風揚微綃洪流何浩蕩脩芒鬱宮堯誰謂晉京遠室
邇身實遼誰謂邑宰輕令名患不劭人生天地間百年
孰能要頽如槁石火瞥若截道颯齊都無遺聲桐鄉

有餘謠福謙在純約害盈由矜驕雖無君人德視民庶
不忮

其二

日夕陰雲起登城望洪河川氣冒山嶺驚湍激巖阿歸
鴈映蘭時遊魚動圓波鳴蟬厲寒音時菊耀秋華引領
望京室南路在伐柯大厦緬無覲崇芒鬱嵯峨揔揔都
邑人擾擾俗化訛依水類浮萍寄松似懸蘿朱博糾舒
慢楚風被琅邪曲蓬何以直託身依叢麻黔黎竟何常

政成在民和位同單父邑愧無子賤歌豈敢陋微官但
恐忝所荷

在懷縣作二首

潘岳

南陸迎修景朱明送末垂初伏啓新節隆暑方赫曦朝
想慶雲興夕遲白日移揮汗辭中宇登城臨清池涼颼
自遠集輕襟隨風吹靈圃耀華果通衢列高椅冰飈蔓
長苞薑芋芬廣畦稻栽肅仟仟黍苗何離離虛薄乏時
用位微名日卑驅役宰兩邑政績竟無施自我違京輦

四載迄於斯器非廊廟姿屢出固其宜徒懷越鳥志眷
戀想南枝

其二

春秋代遷逝四運紛可喜寵辱易不驚戀本難為思我
來冰未泮時暑忽隆熾感此還期淹歎彼年往駛登城
望郊甸游目歷朝寺小國寡民務終日寂無事白水過
庭激綠槐夾門植信美非吾土祇攬懷歸志眷然顧鞏
洛山川邈離異願言旋舊鄉畏此簡書忌祇奉社稷守

恪居處職司

哀詩

潘岳

淮如葉落樹遡若雨絕天雨絕有歸雲葉落何時連山
氣冒岡嶺長風鼓松栢堂虛聞鳥聲室暗如日夕晝愁
奄逮昏夜思忽終昔展轉獨悲窮泣下沾枕席人居天
地間飄若遠行客先後詎能幾誰能敝金石

三月三日洛水作

潘尼

啓運無窮已時逝焉可追斗酒足為歡臨川胡獨悲暮

春春服成百草敷英蕤聊為三日遊方駕結龍旂廊廟
多豪俊都邑有豔姿朱軒陰蘭翠幙映洛湄臨崖濯
素手步水褰輕衣沈鈎出比目舉弋落雙飛羽觴乘波
進素俎隨流歸

贈河陽詩

潘尼

虞生化單父子奇蒞東阿桐鄉建遺烈武城播絃歌逸
驥騰夷路潛龍躍洪波弱冠步鼎鉉既立宰三河流聲
馥秋蘭擣藻豔春華徒美天資茂豈謂人爵多

詠史三首 左思

弱冠弄柔翰卓犖觀羣書著論準過秦作賦擬子虛邊
城苦鳴鏑羽翼飛京都雖非甲冑士疇昔覽穰苴長嘯
激清風志若無東吳鈐刀貴一割夢想騁良圖左眇澄
江湘右盼定羌胡功成不受爵長揖歸田廬

其二

濟濟京城內赫赫王侯居冠蓋陰四術朱輪竟長衢朝
集金張館暮宿許史廬南隣擊鐘磬北里吹笙竽寂寂

楊子宅門無卿相與寥寥空宇中所講在玄虛言論準
宣尼辭賦擬相如悠悠百世後英名擅八區

其三

習習籠中鳥舉翮觸四隅落落窮巷士抱影守空廬出
門無通路枳棘塞中塗計策棄不收塊若枯池魚外望
無寸祿內顧無斗儲親戚還相蔑朋友日夜疎蘇秦吐
游說李斯西上書俛仰生榮華咄嗟復凋枯飲河期滿
腹貴足不願餘巢林栖一枝可為達士模

招隱二首

左思

杖策招隱士，荒塗橫古今。
巖穴無結構，丘中有鳴琴。
白雲停陰岡，丹葩曜陽林。
石泉漱瓊瑤，纖鱗或浮沈。
非必絲與竹，山水有清音。
何事待嘯歌，灌木自悲吟。
秋菊兼餽糧，幽蘭間重襟。
躊躇足力煩，聊欲投吾簪。

其二

經始東山廬，果下自成榛。
前有寒泉井，聊可瑩心神。
峭蒨青葱間，竹柏得其真。
弱葉棲霜雪，飛榮流餘津。
爵服

無常玩好惡有屈伸結綬生纏牽彈冠去埃塵惠連非
吾屈首陽非吾仁相與觀所尚逍遙撰良辰

雜詩三首

張協

大火流坤維白日馳西陸浮陽映翠林迴颿扇綠竹飛
雨灑朝蘭輕露栖叢菊龍蟄暄氣凝天高萬物肅弱條
不重結芳蕤豈再馥人生瀛海內忽如鳥過目川上之
歎逝前修以自勗

其二

朝霞迎白日丹氣臨暘谷翳翳結繁雲森森散雨足輕
風推勁草凝霜竦高木密葉日夜疎叢林森如束疇昔
歎時遲晚節悲年促歲暮懷百憂將從季主卜

其三

昔我資章甫聊以適諸越行行入幽荒甌駱從祝髮窮
年非所用此貨將安設瓠瓠夸璵璠魚目笑明月不見
郢中歌能否居然別陽春無和者巴人皆下節流俗多
昏迷此理誰能察

雜詩 王諧

朔風動秋草邊馬有歸心胡寧久分析靡靡忽至今王
事離我志殊隔過商參昔往鷓鴣鳴今來蟋蟀吟人情
懷舊鄉客鳥思故林師消久不奏誰能宣我心

答傅咸 郭泰機

皦皦白素絲織為寒女衣寒女雖妙巧不得秉杼機天
寒知運速況復鴈南飛衣工棄刀尺棄我忽若遺人不
取諸身世事焉所希況復已朝餐曷由知我饑

答盧諶

劉琨

音以賞奏味以殊珍文以明言言以暢神之子之往四
美不臻澄醪覆觴絲竹生塵素卷莫啓幄無談賓既孤
我德又闕我鄰

贈劉琨二首

盧諶

纖質實微衝颯斯值誰謂言精致在賞意不見得魚亦
忘厥餌遺其形骸寄之深識

其二

先民頗意潛山隱
几仰熙丹崖俯澡綠水無求於和自
附衆美慷慨遐蹤有愧高旨

贈崔溫

盧諶

逍遙步城隅暇日聊游豫
北眺沙漠垂南望舊京路
平陸引長流岡巒挺茂樹
中原厲迅颿山阿起雲霧
游子恒悲懷舉目增永慕
良儔不獲偕舒情將焉訴
遠念賢士風遂存往古務
胡鄙多俠氣豈惟地所固
李牧鎮邊城荒夷懷南懼
趙奢正疆場秦人折北慮
羈旅及寬政

委質與時遇恨以駕蹇姿徒煩非子御亦既弛負擔忝
位宰黔庶苟云免罪戾何暇收民譽倪寬以殿黜終乃
最衆賦何武不赫赫遺愛常在去古人非所希短弱自
有素何以敷斯辭惟以二子故

答魏子悌

盧湛

崇臺非一榦珍裘非一腋多士成大業羣賢濟弘績遇
蒙時來會聊齊朝彥跡顧此腹背羽愧彼排虛翮寄身
陰四岳託好憑三益傾蓋雖終朝大分邁疇昔在危每

同險處安不異易俱涉晉昌艱共更飛狐厄恩由契闊
生義隨周旋積豈謂鄉曲譽謬充本州役乖離令我感
悲欣使情惕理以精神通匪曰形骸隔妙詩申篤好清義
貫幽蹟恨無隋侯珠以鼎荆文璧

覽古詩

盧諶

趙氏有和璧天下無不傳秦人來求市厥價徒空言與
之將見賣不與恐致患簡才備行李圖令國命全蘭生
在下位繆子稱其賢奉辭馳出境伏軾徑入關秦王御

殿坐趙使擁節前揮袂睨金柱身玉要俱捐連城既偽
往荆玉亦真還爰在澠池會二主尅交歡昭襄欲負力
相如折其端臂血下沾襟怒髮上衝冠西缶終雙擊東
瑟不隻彈捨生豈不易處死誠獨難稜威章臺顛疆禦
亦不干屈節邯鄲中俛首忍回軒廉公何為者負荆謝
厥讐智勇冠當世弛張使我歎

時興詩

盧諶

亶亶圓象運悠悠方儀廓忽忽歲云暮游原采蕭藿北

踰芒與河南臨伊與洛凝霜沾蔓草悲風振林薄撼撼
芳葉零葉葉芬華落下泉激冽清曠野增遼索登高眺
遐荒極望無崖壑形變隨時化神感因物作澹乎至人
心恬然存玄漠

遊仙詩五首

郭璞

青溪千餘仞中有一道士雲生梁棟間風出窓戶裏借
問此何誰云是鬼谷子翹迹企潁陽臨河思洗耳閭闔
西南來潛波渙鱗起靈妃顧我笑粲然啟玉齒蹇修時

不存要之將誰使

其二

翡翠戲蘭苕容色更相鮮
綠蘿結高林蒙籠蓋一山中
有冥寂士靜嘯撫清絃
放情凌霄外嚼蘂挹飛泉
赤松臨上游駕鴻乘紫煙
左挹浮丘袂右拍洪崖肩
借問蜉蝣輩寧知龜鶴年

其三

逸翮思拂霄迅足羨遠遊
清源無增澗安得運吞舟
珪

璋雖特達明月難闇投潛潁怨青陽陵茗哀素秋悲來
惻丹心零淚緣纓流

其四

雜縣寓魯門風暖將為災吞舟涌海底高浪駕蓬萊神
仙排雲出但見金銀臺陵陽挹丹溜容成揮玉杯姮娥
揚妙音洪崖頷其頤升降隨長煙飄飄戲九垓奇齡邁
五龍千歲方嬰孩燕昭無靈氣漢武非仙才

其五

暘谷吐靈曜扶桑森千丈朱霞升東山朝日何晃朗
廻風流曲櫺幽室發逸響悠然心永懷眇爾自遐想仰思
舉雲翼延首矯玉掌嘯傲遺世羅縱情在獨往明道雖
若昧其中有妙象希賢宜勵德羨魚當結網

三月三日臨曲水

庾闡

暮春濯清汜游鱗泳一壑高泉吐東岑洄瀾自淨衆臨
川疊曲流豐林映綠薄輕舟沈飛觴鼓枻觀魚躍

涉湖

李顥

旋經義興境弭棹石蘭渚震澤為何在今唯太湖浦圓
徑縈五百眇目緬無覩高天淼若岸長津雜如縷窈窕
循灣漪迢遞望巒嶼驚飈揚飛湍浮霄薄懸岨輕禽翔
雲漢游鱗憇中許黯藹天時陰岩堯舟航舞憑河安可
殉靜觀戒征旅

贈何劭王濟

傅咸

日光太清列宿曜紫微赫赫大晉朝明明闕皇闈吾
兄既鳳翔王子亦龍飛雙鸞遊蘭渚二離揚清暉攜手

升玉階並坐侍丹帷金璫綴惠文煌煌發令姿斯榮非
攸庶繾綣情所希豈不企高蹤麟趾邈難追臨川靡芳
餌何為守空坻槁葉待風飄逝將與君違違君能無戀
尸素當言歸歸身遂革廬樂道以忘饑進則無云補退
則恤其私但願隆弘美王度日清夷

雜詩

張翰

暮春和氣應白日照園林青條若總翠黃華如散金嘉
卉亮有觀顧此難久耽延頸無良塗頓足託幽深榮與

壯俱去賤與老相尋歡樂不照顏慘愴發謳吟謳吟何
嗟及古人可慰心

從征行方頭山

袁宏

峩峩太行凌虛抗勢天嶺交氣窈然無際澄流入神玄
谷應契四象悟心幽人來憇

詠史

袁宏

周昌梗槩臣辭達不為訥汲黯社稷器棟梁天表骨陸
賈厭解紛時與酒檮杌婉轉將相門一言和平勅趨舍

各有之俱令道不沒

夜聽擣衣

曹毗

寒興御紈素雅人理衣衾冬夜清且永皓月照堂陰纖
手疊輕素朗杵叩鳴砧清風流繁節迴飈灑微吟嗟此
嘉運速悼彼幽滯心二物感余懷豈但聲與音

神情詩

顧愷之

春水滿四澤夏雲多奇峯秋月揚明輝冬嶺秀孤松

和劉柴桑

陶淵明

山澤久見招胡事乃躊躇直為親舊故未忍言素居良
辰入奇懷挈杖還西廬荒途無歸人時時見廢墟茅茨
已就治新疇復應畬谷風轉淒薄春醪解饑飢弱女雖
非男慰情良勝無栖栖世中事歲月共相疎耕織稱其
用過此奚所須去去百年外身名同翳如

歸田園居五首

陶淵明

少無適俗韻性本愛丘山誤落塵網中一去三十年羈
鳥戀舊林池魚思故淵開荒南野濟守拙歸田園方宅

十餘畝草屋八九間榆柳蔭後園桃李羅堂前曖曖遠
人村依依墟里煙狗吠深巷中鷄鳴桑樹巔戶庭無塵
雜虛室有餘閒久在樊籠裏復得返自然

其二

野外罕人事窮巷寡輪鞅白日掩荆扉虛室絕塵想時
復墟曲中披草共來往相見無雜言但道桑麻長桑麻
日已長我土日已廣常恐霜霰至零落同草莽

其三

種豆南山下草盛豆苗稀晨興理荒穢帶月荷鋤歸道
狹草木長夕露沾我衣衣沾不足惜但使願無違

其四

久去山澤游浪莽林野娛試携子姪輩披榛步荒墟徘
徊丘隴間依依昔人居井竈有遺處桑竹殘朽株借問
採薪者此人皆焉如薪者向我言死沒無復餘一世異
朝市此語真不虛人生似幻化終當歸空無

其五

悵恨獨策還崎嶇歷榛曲山澗清且淺遇以濯吾足漉
我新熟酒隻鷄招近局日入室中閤荆榛代明燭懽來
苦夕短已復至天旭

辛丑歲七月赴假還江陵夜行塗口作

陶淵明

閒居三十載遂與塵事冥詩書敦宿好林園無俗情如
何捨此去遙遙至南荆叩枻新秋月臨流別友生涼風
起將夕夜景湛虛明昭昭天宇闊晶晶川上平懷役不
遑寐中宵尚孤征商歌非吾事依依在耦耕投冠旋舊

墟不為好爵縈養真衡茅下庶以善自名

飲酒二首

陶淵明

結廬在人境而無車馬喧問君何能爾心遠地自偏採菊東籬下悠然見南山山氣日夕佳飛鳥相與還此中有真意欲辯已忘言

其二

長公曾一仕壯節忽失時杜門不復出終身與世辭仲理歸大澤高風始在茲一往便當已何為復狐疑去去

當奚道世俗久相欺擺落悠悠談請從余所之

雜詩二首

陶淵明

人生無根蒂飄如陌上塵分散逐風轉此已非常身落
地為兄弟何必骨肉親得懽當作樂斗酒聚比鄰盛年
不重來一日難再晨及時當勉勵歲月不待人

其二

白日淪西河素月出東嶺遙遙萬里輝蕩蕩空中景風
來入房戶夜中枕席冷氣變悟時易不眠知夕永欲言

無子和揮杯勸孤影日月擲人去有志不獲騁念此懷
悲悽終曉不能靜

讀山海經十三首

陶淵明

孟夏草木長遶屋樹扶疎衆鳥欣有托吾亦愛吾廬既
耕亦已種時還讀我書窮巷隔深轍頗迴故人車歡言
酌春酒摘我園中蔬微雨從東來好風與之俱汎覽周
王傳流觀山海圖俯仰終宇宙不樂復何如

其二

玉臺凌霞秀王母怡妙顏天地共俱生不知幾何年靈
化無窮已館宇非一山高酣發新謠寧效俗中言

其三

迢遞槐江嶺是謂玄圃丘西南望崑墟光氣難與儔亭
亭明玕照落落清瑤流恨不及周穆託乘一來游

其四

丹木生何許迺在崑山陽黃花復朱實食之壽命長白
玉凝素液瑾瑜發奇光豈伊君子寶見重我軒皇

其五

翩翩三青鳥毛色奇可憐
朝為王母使暮歸三危山
我欲因此鳥具向王母言
在世無所須惟酒與長年

其六

逍遙蕪臯上杳然望扶木
洪柯百萬尋森散覆暘谷
靈人侍丹池朝朝為日浴
神景一登天何幽不見燭

其七

粲粲三株樹寄生赤水陰
亭亭凌風桂八幹共成林
靈

鳳撫雲舞神鸞調玉音雖非世上寶爰得王母心

其八

自古皆有沒何人得靈長不死復不老萬歲如平常赤泉給我飲員丘足我糧方與三辰游壽考宜渠央

其九

夸父誕宏志乃與日競走俱至虞淵下似若無勝負神力既殊妙傾河焉足有餘迹寄鄧林功竟在身後

其十

精衛銜微木將以填滄海刑天舞干戚猛志故常在同
物既無慮化去不復悔徒設在甘心良辰詎可待

其十一

巨猾肆威暴欽馭違帝旨竄竄強能變祖江遂獨死明
明上天鑒為惡不可履長枯固已劇鵠鶚豈足恃

其十二

鵠鶚見城邑其國有放士念彼懷王世當時數來止青
丘有奇鳥自言獨見爾本為迷者生不以喻君子

其十三

巖巖顯朝市帝者慎用才何以廢共繇重華為之來仲
父獻誠言姜公乃見猜臨沒告饑渴當復何及哉

南州桓公九井作

殷仲文

四運雖鱗次理化各有準獨有清秋日能使高興盡景
氣多明遠風物自淒緊爽籟驚幽律哀壑叩虛牝歲寒
無早秀浮榮甘夙隕何以標真脆薄言寄松菌哲匠感
蕭晨肅此塵外軫廣筵散泛愛逸爵紆勝引伊余樂好

仁惑祛吝亦泯猥首阿衡朝將貽句奴晒

遊西池

謝琨

悟彼蟋蟀唱信此勞者歌有來豈不疾良遊常蹉跎逍
遙越城肆願言屢經過廻阡被陵關高臺眺飛霞惠風
蕩繁囿白雲屯曾阿景晨鳴禽集水木湛清華褰裳順
蘭沚徙倚引芳柯美人愆歲月遲暮獨如何無為牽所
思南榮戒其多

反招隱詩

王康琚

小隱隱陵藪大隱隱朝市伯夷竄首陽老聃伏柱史昔
在太平時亦有巢居子今雖盛明世能無中林士放神
青雲外絕迹窮山裏鷗鷺先晨鳴哀風迎夜起凝霜凋
朱顏寒泉傷玉趾周才信衆人偏智任諸已推分得天
和矯性失至理歸來安所期與物齊終始

帆入南湖

湛方生

彭蠡紀三江廬岳主衆阜白沙淨川路青松蔚巖首此
水何時流此山何時有人運互推遷茲器獨長久悠悠

宇宙中古今迭先後

四月八日讚佛詩

支遁

三春迭云謝首夏含朱明祥祥今日泰朗朗玄夕清菩
薩彩靈和眇然因化生四王應期來矯掌承玉形飛天
鼓弱羅騰曜散芝英綠瀾頽龍首縹葉翳流冷芙蕖育
神葩傾柯獻朝榮芳津沛四境甘露凝玉瓶珍祥盈四
入玄黃曜紫庭感降非情想恬怕無所營玄根泯靈府
神條秀形名圓光朗東旦金姿艷春精含和總八音吐

納流芬馨跡隨因溜浪心與太虛冥六度起窮俗八解
濯世纓慧澤融無外空同忘化情

詠懷

支遁

晞陽熙春圃悠緬歎時往感物思所託蕭條逸韻上尙
想天台峻髣髴巖堦仰冷風灑蘭林管瀨奏清響霄崖
育靈藹神䟽含潤長丹沙映翠瀨芳芝曜五爽茗茗重
岫深寥寥石室朗中有尋化士外身解世網抱朴鎮有
心揮玄拂無想隗隗形崖頽罔罔神宇敞宛轉元造化

縹帟鄰大象願投若人蹤高步振策杖

陵峯採藥觸興為詩

帛道猷

連峯數千里修林帶平津雲過遠山翳風至梗荒榛茅
茨隱不見鷄鳴知有人閒步踐其徑處處見遺薪始知
百代下故有上皇民

古今詩刪卷七